

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-03763-2014
Broj akta: 05EN-001
Gračanica, 28.08.2014. godine

Z A P I S N I K
SA 22. SJEDNICE OPĆINSKOG VIJEĆA
GRAČANICA

Održane dana 28. 08. 2014. godine u sali za sjednice nove zgrade Općine sa početkom u 11,00 sati.

Početu sjednice je prisustvovalo 27 članova Općinskog vijeća Gračanica.

Odsutni su: Ahmetašević Jasenka, Puškar Hasan i Rahim Gadžić.

Sjednicu je vodio predsjedavajući Općinskog vijeća Gračanica Edin Ibrisević, zajedno sa zamjenikom Seadom Gazibegovićem i sekretarom Zehrom Mujačić.

Zapisnik vodio Damir Delić, a vršilo se i tonsko snimanje sjednice.

Pored članova Općinskog vijeća sjednici su prisustvovali i Općinski načelnik Nusret Helić, Azra Mustajbašić pomoćnik načelnika, Jasminka Imširović Općinski pravobranilac, šefovi službi za upravu Zijad Dedić i Mustafa Bajić, izvjestioci Vanesa Mahmutović i Sajima Zaketović, poslanik u Skupštini TK Džemal Jukan, predstavnici sredstava informisanja i predstavnici Plenuma Gračanica.

Zapisnik sa 21. sjednice Općinskog vijeća Gračanica usvojen je jednoglasno.

Prije prelaska na postavljanje pitanja i inicijativa, predsjedavajući Općinskog vijeća Gračanica naglasio je, da je na prošloj sjednici Vijeća usvojen novi Poslovnik Općinskog vijeća i zamolio članove Vijeća da se pridržavaju odredbi istog naročito odredbi članova 47, 52, 53, 54, 55, 57 i 140, kada su u pitanju vijećnička pitanja i inicijative, te napomenuo da ima vremena jedan sat koliko je predviđeno za to i ako neko nije došao na red, na narednoj sjednici će biti prvi na redu. Isto tako je zamolio da se pitanja i inicijative u skladu sa odredbama člana 140, dostavljaju u pismenoj formi.

Pitanja i inicijative kandidovali su:

Gazibegović Admir:

„Ja imam dva pitanja i jednu inicijativu. Imao sam još jedno pitanje ali mi Poslovnik to ne dozvoljava, pa bih prokomentarisao odgovor koji sam dobio iz Opće bolnice. Upozorio bih Upravni odbor Opće bolnice da svoj posao rade po po zakonu i pravilnicima bolnice. Sada prelazim na pitanja. Pitanje upućujem inspektorima za vodotoke II kategorije. Zašto inspektori

nisu izašli na teren, u ovom slučaju radi se o koritu rašljevačke rijeke koja protiče kroz naselje Donja Orahovica i naložili pojedinim građanima da zemljište koje su uzurpirali vrate koritu iste. **Obrazloženje:** U poplavama koje su se dogodile u maju poplavljeno je 75, a u ovim posljednjim preko 100 stambenih objekata koji su uz korito Rašljevačke rijeke. Tražim u ime građana Mjesne zajednice Donja Orahovica da i nadležno ministarstvo što prije naredi inspektorima da izađu na teren i sankcionišu sve koji su uzurpirali zemljište koje pripada koritu, u slučaju da se to ne desi hitno, podnijecemo tužbu i tražiti nadoknadu štete od odgovornih. Drugo pitanje upućujem Direkciji za ceste F BiH odnosno inspektoratu iste. Zašto inspektori ove direkcije ne izađu na teren i nalože: da svi koji su nepropisno i bez dozvole napravili prilaz kući te time smanjili protok a na mjestima potpuno zatvorili odvodne kanale uz regionalni put Doboj-Tuzla u naselju Donja Orahovica moraju iste napraviti u skladu sa propisima i odgovarajućim dozvolama. **Obrazloženje:** U posljednjim poplavama veći dio naselja je poplavljen zbog odvodnih kanala u samom centru naselja koji su na pojedinim mjestima zatvoreni u dužini i do 30 metara. Građani Mjesne zajednice Donja Orahovica su me zadužili da upozorim na problem koji se vuče godinama i da javno kažem ukoliko se vrlo brzo nešto ne učini po ovom pitanju da ćemo podići tužbu protiv Direkcije i inspektora koji su dobro preplaćeni za svoj posao koji po zakonu moraju raditi a to znači da isti krše svojim neradom. Pokrećem inicijativu prema općinskom načelniku i Općinskom vijeću da određena sredstva iz rezerve budžeta ili sa nekog drugog ekonomskog koda, a po predmjeru i predračunu stručnih komisija usmjere za Osnovnu školu „Orahovica“ i Društveni dom u Donjoj Orahovici. **Obrazloženje:** U nepogodi koja je u subotu 23.08.2014.godine pogodila Donju Orahovicu, kada je led koji je uništio preko 1.000 krovova, a to je prema prvim procjenama preko 1.000.000 komada crijepa ošteti i Društveni dom i Osnovnu školu Orahovica Donja. Naime krov na školi je uništen. Stari dio škole koji nema ploče pod krovom, a ni međuspratne se počeo urušavati, a novi dio škole bi trebalo samo krov sanirati ali je problem što ima samo šest učionica u novom dijelu a 13 je odjeljenja tako da je nastavu teško organizovati i u dvije smjene, oštećen je krov na fiskulturnoj sali i polupana su stakla a na kotlovnici je isto uništen krov. Društveni dom u kojem je smještena ambulanta, matični ured, pošta, centrala telefonska, prostorije M.Z., šahovski klub, KUD „Mirsad Sinanović“, UM „Velika djeca“, diskoteka „Ambasada“, samoposluga „Bosna“ i to uništen je crijep gotovo u potpunosti oko 19.000 komada“.

Fadil Mešić:

“Ja imam dvije vijećničke inicijative. Prva inicijativa je na zahtjev MZ Vranovići i glasi gospodine načelnice prije 40 dana BH Telekom je počeo sa gradnjom repetitora u MZ Miričina, mahala “Brda”. Svima nam je poznato da ovi repetitori proizvode maligne bolesti uništava sve vrste insekata, pčele i ostalo. Repetitor se gradi nedaleko od prvih kuća 50 metara samo, a 20 kuća je u neposrednoj blizini. U krugu od 300 metara zračne linije nalazi se 150 kuća. Postavljam pitanje načelniku tko je mogao odobriti potrebnu dokumentaciju za početak gradnje repetitora i da li je Općina nadležna za to. Stub je predviđen visine 44 m + 12 m antena. Posebnu odgovornost će snositi inspektor za okoliš. Vijeće MZ Miričina nije upoznato sa izgradnjom repetitora mahala “Brda”. Niko iz Općine nije tražio dozvolu niti bilo kakvo mišljenje od Vijeća MZ Miričina. U ovom slučaju mještani su zabranili izgradnju repetitora, samoinicijativno. I spremni su o svaku cijenu onemogućiti daljnju gradnju. Druga vijećnička inicijativa se odnosi na sazivanje vanredne sjednice Općinskog vijeća sa temom sanacija šteta usled elementarnih nepogoda.

Vijećničko pitanje upućeno Zijadu Dediću u aprilu sam postavio pitanje uspostave taksi stajališta ispred bolnice. Tada ste obećali da će te riješiti vrlo brzo. Udruženje taksista općine Gračanica traži da se hitno riješi pitanje taksi stajališta ispred bolnice. Nerješavajući ovaj

problem indirektno omogućujete rad na crno taksista. Zatim ovo isto udruženje traži da se ponovo uspostavi (2) dva mjesta preko puta Autobuske stanice gdje je nekad i bilo taksi stajalište.

Mirza Omerdić:

“Ja imam dvije vijećničke inicijative. Prva inicijativa je na zahtjev MZ Vranovići i glasi: Obraćam se Općinskom načelniku sa inicijativom da se hitno izvrši sanacija puteva u MZ Vranovići. Naime, od četiri izlaza (puta) iz ove mjesne zajednice, dva su u potpunosti neprohodna (Vranovići-Gornja Lohinja-Gračanica i Vranovići-Sladna-Srebrenik), a dok su ostala dva putna pravca (Vranovići-Bukva i Vranovići-Plane) u takvom stanju da se saobraćaj odvija otežano i pitanje je vremena, ako se hitno ništa ne preduzme kada će i oni biti neprohodni. Pored toga nije izvršeno ni obilježavanje i upozorenja na opasnosti na dijelovima pomenutih puteva koji su jako stradali od klizišta i poplava, te je bezbjednost saobraćaja itekako ugrožena. Povrh svega, na pragu nam je i školska godina i ako se do početka iste ne izvrši sanacija, pitanje je dali će učenici iz ove mjesne zajednice moći doći do svojih škola. Isto tako sva četiri puta su alternativni izlazi na regionalne puteve Gračanica-Srebrenik i Gračanica-Srnice i u situacijama kada ovi putevi nisu prohodni od Gračanice do Bukve, koriste se ovi alternativni izlazi, te se na takav način često stvara dodatno opterećenje na iste i ubrzava njihovo stradanje a njihovo saniranje nije vršeno u posljednjih nekoliko godina, što je svakako dodatni razlog da se hitno interveniše i izvrši neophodna sanacija, a iskreno se nadam da će se to i uraditi.

Želio bih da pokrenem ispred Kluba SDA inicijativu za sazivanje vanredne sjednice, sa temom razmatranja stanja elementarnih nepogoda, koje nas neprestano bombarduju i koje pokazuje da smo nespremni da se zaštitimo od njih. Razlozi za sazivanje vanredne sjednice su mnogobrojni, sve i jedan građanin naše općine je dovoljan razlog za sjednicu. Neki će kazati da Vijeće nije nadležno za operativno djelovanje, da je to načelnik, ali i Vijeće u vanrednim okolnostima treba da djeluje vanredno. Danas je čudno vrijeme, danas se bilo kakva vrsta javnog zahtjeva za djelovanje, može protumačiti kao predizborna aktivnost i to će se uraditi. Ali bez obzira na to, ja ću kazati i ovo: Općinsko vijeće upoznato sa aktivnostima koje je Općina poduzela za sanaciju šteta u maju, tek se popisuju štete koje su se desile nedavnim poplavama, vidimo da se nešto radi i na određenim lokacijama vidimo mašine ali nismo upoznati sa sistemom, sa planom sanacija šteta. Nismo upoznati ni sa svim prioritetima koje treba rješavati. Rečeno je da sve mjesne zajednice, nisu dostavile prioritete što pokazuje organizacioni propust u koordinaciji sa Vijećem MZ. Postoje određene sanacije koje zahtijevaju samo administrativnu stranu od strane Općine, kao što je utvrđivanje riječnog pojasa za brdske rječice. Što se Općinskog vijeća tiče u pogledu ovoga o čemu sam govorio vlada mrkli mrak. Definitivno neće biti dovoljno ili dostatno da Općina sama sanira štete sa svojim budžetom, ali je nama jasno šta nam je činiti u vezi sa time, gdje smo angažovali sredstva, koliko novca smo potrošili, koliko još trebamo, gdje ćemo taj novac tražiti. Šta ćemo uraditi dalje, gdje ćemo tražiti sredstva? Počesto se zna desiti da nema novca za rješavanje vanrednih stvari u mjesnim zajednicama. U Vranovićima u Rašljevi je prekinuta putna komunikacija. Sad imamo i Orahovicu, koja hvala Bogu, se sanira sa pomoći. Svjedoci smo da su odobrena sredstva na nivou EU, donatorska sredstva koja se mogu aktivirati samo projektima. Prije nekoliko dana je u Stjepan Polju bila delegacija iz Švedske za sanaciju vodovodne mreže, gdje treba uraditi projekat, aplicirati i koristiti ta sredstva. Već su pokrenute aktivnosti za izradu projekata. Vidimo da je punjenje budžeta i na temelju općinskih prihoda od viših nivoa vlasti slabije i u odnosu na onu najnepovoljniju varijantu. Svi će morati stegnuti kaiš, moraćemo se odreći svog komoditeta zarad očuvanja života. Dakle, Općinsko vijeće, Klub SDA želi vanrednu sjednicu kako bi: bilo upoznato sa aktivnostima koje su poduzete na sanaciji šteta (SDA je tražila da se u sklopu redovne

sjednice danas uvrsti tačka dnevnog reda vezana za ovu temu ali komisije nisu bile završile evidenciju nedavnih šteta). Ali imam informaciju da su već završili. Trebali bi zbog toga razmatrati prioritete sanacije šteta, šta je urađeno i šta treba uraditi, koliko je novca potrebno i dali ćemo ići na zaduživanje kod banaka, na projekte iz donatorskih sredstava i kako se organizovati, na zaduživanja kod dobavljača i slično. Postoji realna potreba za to.

Mirsad Čamdžić:

“Ovo što je Mirza govorio, ja sam izašao da postavim pitanje, a da ćemo razmatrati dopune i komentare kada budemo razmatrali dnevni red i slažem se sa ovim da vijećnici apsolutno nisu upoznati ni sa čim u ovim dešavanjima. Konkretno ne znamo naša inicijativa vezana oko 35.000,00 od Vlade Federacije kako je u konačnici završila. Šta je sa pomoći Federalne vlade, Kantonalne vlade? Evo iz medija možemo saznati da je Muftijstvo uputilo neku pomoć. Šta je sa famoznom trafo stanicom, Elektro prenosom? Da li se nešto poduzelo u tom pravcu? Kako se ponaša Elektroprivreda u svemu tome? Ko je radio oko ovih poplava, šta je radio, koliko je koštalo? Hoće li pomoć “moći” zaklopiti do sada urađeno? To su sve informacije koje vijećnici trebaju imati pred sobom i mislim da trebamo znati nešto o ovome.

Podržavam ovo, a predsjedavajući možda i vama jedna kritika, u ovom dnevnom redu nemamo apsolutno ništa što bi nam dalo bar nekoliko informacija. Znam da su stvari žive i da se stalno ažuriraju, ali se bar nešto moglo znati iz svih tih aktivnosti. Ovo zbog čega sam izašao je vijećničko pitanje grupe mještana iz Pribave. Ovom prilikom obraćam vam se kao vijećniku Općinskog vijeća Gračanica sa željom da na narednoj sjednici kandidujete slijedeće pitanje, odnosno problem sa kojim se susreću mještani Pribave. Prilikom svakih, iole malo obilnijih kišnih padavina, oko 50-ak domaćinstava Pribave iz dijelova sela, Meraje, te nekoliko kuća u blizini “Lipljanske” odnosno “Pribavske” rijeke susreće se sa problemom plavljenja stambenih i drugih objekata. Štete su ogromne a posebno su velike bile tokom majskih i avgustovskih poplava. Ovi dijelovi sela su jedni od najugroženijih i uvijek je na udaru 50-ak istih domaćinstava. Ovi dijelovi su plavljeni i ranijih godina. Sve što je urađeno na rješavanju ovog problema jeste jedan idejni projekt rješenja koji se nalazi kod osoba u Mjesnoj zajednici. Da stvar bude još apsurdnija, novčana sredstva koja su potrebna za rješavanje ovog problema su sve samo ne velika i iznose prema projektu oko 3.000 KM. Da budemo precizni, potrebno je urediti, proširiti oko 200-ak metara kanala i postaviti maksimalno 5-7 cijevi velikog promjera. Sa ovim dijelom urađenog posla bio bi veoma efikasno i jeftino riješen problem plavljenja 50-ak domaćinstava u kojima je direktno oštećeno više od 200 mještana Pribave. Ovom prilikom molimo vas, Općinsko vijeće Gračanica, da uvažite ovu našu molbu, da odobrite sredstva kako bi ovaj problem bio riješen. Pred sam početak sjednice, tačnije i prije sam dobivao od mještana iz Donje Piskavice vezano za put Donja Piskavica-Ćorići, zaseok Ćorići, i ljudi mole da se dođe i pogleda kako izgleda taj put i to neko iz nadležne službe pa ako može da za narednu sjednicu pripremi informaciju o tome”.

Pjanić Safet:

“Ja imam tri pitanja i jednu inicijativu. Nisam ništa napisao, ali mogu dostaviti u toku sjednice i pismeno. Ako je po poslovniku dva, onda ću kandidovati dva pitanja. Prvo pitanje bih uputio načelniku Opštine. Dokle se došlo sa protugradnom odbranom. Da li smo to mogli uklopiti u tačku dnevnog reda o izvršenju budžeta ali i tamo se može javiti oko te tačke i ako bude potrebno javit ću se i kasnije. Drugo pitanje je da li smo aplicirali za sredstva Fonda solidarnosti Federacije sa sastanka održanog 25 ove godine. Inicijativa je ista kao i od strane mojih kolega, za vanrednu sjednicu Opštinskog vijeća. Mislim da je to trebalo biti odmah, poučeni iskustvom od prije a znamo da su to radile i dvije opštine u Federaciji kada su tu ovi nemili događaji i radili su odmah na vanrednoj sjednici Opštinskog vijeća.

Mi smo najugroženija opština trenutno u Federaciji i mislim da to nije trebalo izostati nikako”.

Esma Pašić:

“Upućujem vijećničku inicijativu Općinskom načelniku, a odnosi se na formiranje protivgradne zaštite na području općine Gračanica. Obrazloženje: Svjedoci smo činjenice da je prirodna katastrofa ove godine u tri navrata pogodila našu općinu Gračanica. Majske poplave, potom avgustovske, a posljednje nevrijeme uništilo je krovove na stotine stambenih i privatnih objekata na području Mjesne zajednice Donja Orahovica, Rašljeva, Lohinja. Obzirom da ide jesen, ide sezona novih obimnijih padavina, a posla je i onako previše. Kao predstavnik građana i vijećnika iz reda opozicije dužna sam da sa ovoga mjesta uputim inicijativu za protivgradnu zaštitu i da kažem da će od nas kao opozicije, vlast uvijek imati punu podršku za sve ono što bude konkretno radila, a što je u interesu svih građana, odnosno naroda. Hvala”.

Dino Dedić:

“Ja imam dvije vijećničke inicijative i jedno pitanje. Moja prva vijećnička inicijativa se odnosi na kapitalne projekte. Predlažem da se sredstva po budžetu od 20.000,00 KM koji je ostao za MZ Škahovica usmjere na Avdiće. I to da se uradi geomehaničko ispitivanje, predmjer radova i izrada drenažnog sistema. Obrazloženje: Mi u Škahovici imamo problem klizišta u zaseoku Avdići i Vijeće MZ je u više navrata i više sastanaka baš razgovaralo o tome i donijeli smo Odluku da se ta sredstva usmjere na rješavanje problema ovog zaseoka. Mi zahtijevamo da se taj zaseok u cca do 50 kuća riješi do zime, jer kreće škola, a djeca ne mogu u školu. Ide zima, ne može se nabaviti ogrev a za zimu ne znamo kakve su prognoze, katastrofalne. Takođe ja za ovu inicijativu tražim da se izvrši glasanje, ako je to moguće. Moja druga inicijativa se odnosi na to, da se za prioritete, klizišta, bar njih deset urade projekti kako bi se mogla tražiti sredstva iz viših nivoa i iz drugih izvora. Mi znamo i vjerujemo da Opština daje maksimalne napore, ali možemo i mi možda negdje neka sredstva obezbijediti kako bi se što prije realizovali ovi projekti. I moje pitanje upućujem Aidi Hodžić predsjednici Komisije za određivanje prioriteta, čiji sam i ja član. Pitanje glasi: Zašto se prije nije sazivala ova Komisija, a vidimo da su u međuvremenu nastale nove štete. To me interesuje i zamolio bih da mi se odgovori pismeno”.

Selimović Senad:

“Ja imam dvije inicijative i one glase: Tražim da se što prije izdvoje sredstva iz budžeta Općine Gračanica, kako bi se pomoglo mještanima u izgradnji bazena za pitku vodu, u naseljima Šabići – MZ Trnovci i naselju Kulovići – MZ Džakule. Tražim od Općinskog načelnika da se izdvoje sredstva iz budžeta Općine Gračanica za postavljanje trofaznog brojila u MZ Trnovci”.

Ibrahim Hasić:

“Imam inicijativu koja je naslovljena na BH Telekom dd Direkcija Tuzla, i glasi: U MZ Malešići je u nekoliko navrata započela rekonstrukcija instalacija telefonskog saobraćaja. Mijenjali su se izvođači, kopali, roveli ali nikada nisu završili ovaj posao. Stanje na terenu je takvo da se na popravku kvarova čeka od 20 – 60 dana, ni sami uposlenici ne znaju gdje se nalaze stubići koji su nekada postavljeni. Građani su ogorčeni ovom situacijom i ovakvim ponašanjem BH Telekoma. Dajem inicijativu direktoru Direkcije Tuzla da pod hitno završe započetu rekonstrukciju jer je period od 15 godina predug da bi se više čekalo na kvalitetnu uslugu koju imaju svi ostali građani BH Telekoma”.

Almedin Devedžić:

“Ja ću pokušati da sa ovog mjesta skrenem pažnju na probleme koji su aktuelni u MZ Lukavica kroz određene inicijative. Obzirom da sam danas dobio poziv za sutrašnju komisiju za koju smatram i pridružujem se konstataciji da se trebala mnogo ranije održati i sastane i više puta ako treba s obzirom da imamo strašnu situaciju na terenu uzrokovanu posledicama elementarnih nepogoda. Inicijativa se sastoji u ubrzavanju aktivnosti. Započeli smo neke stvari, međutim pomaka nema u smislu da napokon krenemo i uhvatimo se u koštac s tim problemima. Dakle, izgradnja kuća, porušenih kuća i hitno osposobljavanje glavnog puta Ograđenica-Prnjavor, obzirom da postojeći alternativni put ne može zadovoljiti kapacitet saobraćaja, odnosno kretanje autobusa i težih vozila. Posebno kad su u pitanju učenici koji treba da pohađaju srednju školu u Gračanici. Dakle, evo pozivam Općinskog načelnika da, u toku smo svih tih stvari, međutim potrebno je sve ovo ubrzati. Kad su u pitanju porušene kuće, dakle 16 porodica trenutno nije u svojim domovima. Nalaze se u alternativnim smještajima. Neki su primjereni, a neki uopće nisu. Trudimo se da im pomognemo koliko možemo, međutim, problem je šta dalje s njima. Uradili smo aktivnosti oko obezbjeđivanja lokacije za gradnju tih kuća i naravno i načelnik i općinske službe su u toku. Međutim, stalo se s tim i evo ja tražim odavde, sa ovog mjesta, da se te aktivnosti ubrzaju. Obezbijedili smo zemljište. Evo dok to čekamo možemo rješavati mnoge stvari, kao što je rješavanje pristupnog puta. Znam da je danas tačka dnevnog reda kojom ćemo dati ovlaštenje načelniku za raspisivanje konkursa, a sigurno, evo da iskoristim ovu priliku da pozovem i načelnika i općinske službe da ubrzamo te aktivnosti. Zima je blizu i bojim se da će ti ljudi ostati u alternativnom smještaju i da im nećemo moći pomoći. Naravno, oni su ogorčeni, ne mogu više da čekaju i treba im pomoći u smislu da se ubrzaju aktivnosti da se izvrši razmjerivanje zemljišta, odnosno pristupnog puta i ljudi će sami krenuti, naravno uz pomoć Općine i donatora da se te kuće počnu graditi. Ali moramo krenuti i evo i ovom prilikom, bez obzira što je načelnik upoznat s tim pozivom i njega i sve vas da te aktivnosti ubrzaju i otklone sve prepreke. U MZ Lukavica je ovo veoma izražen problem i treba ih brzo rješavati. Drugi problem je osposobljavanje puta i nadam se da ćemo sutra na komisiji za određivanje prioriteta, to staviti kao prioritet prioriteta i u MZ Lukavica i da se počne hitno rješavati. Vijeće MZ je određene predmjere radova napravilo i pronašlo određene pomagače da kažem donatore koji će pomoći. Ali bez pomoći Općine ne možemo krenuti u sanaciju, ne klizišta nego puta koji će osposobiti nesmetan saobraćaj na glavnom putu. Alternativni put koji smo uradili poslije ove dvije poplave već je uveliko oštećen i danas ga ponovo popravljamo, a svaka nova kiša će ga i dalje narušavati i zbog toga moramo vidjeti šta da uradimo što hitnije”.

Tursunović Esad:

“Idem sa inicijativom s tim da ću vam dostaviti pisani trag. Moja inicijativa se zasniva na osnovu Mirsada Čamdžića, odnosno Mirze Omerdića, ako nam bude ta vanredna sjednica. Da probamo na vanrednoj sjednici da ukonponujemo još tri tačke koje treba razmatrati i koje su veoma bitne za društvo i sredinu. Prva tačka je bezbjedonosna situacija u gradu. Druga tačka je rad preduzeća u nadležnosti Opštine i rad organa Opštine. Znači to su te tri tačke i ako treba mogu pojedinačno za sve tačke prokomentarisati ovo zbog čega sam tražio to”.

Hasan Fehratović:

“Imam dva vijećnička pitanja prema općinskom načelniku. Prvo pitanje je: grupa majki učenika iz Škahovice pita općinskog načelnika kada će djeca u područnoj Osnovnoj školi u Škahovici dobiti priključak pitke vode jer bi moglo doći do epidemije širih razmjera?”

Dokle se stiglo sa konačnim imenovanjem člana UO JZU Opća bolnica “dr. Mustafa Beganović” iz reda Ministarstva zdravstva i dokle je stigla procedura oko imenovanja direktora u navedenoj JZU-vi?

Edin Ibrišević:

“Vijećničku inicijativu upućujem na tri adrese i to: Vlada Federacije BiH, Ministarstvo poljoprivrede, vodoprivrede i šumarstva, Federalna uprava za inspekcijske poslove. Vijećnička inicijativa: Nakon prirodnih katastrofa koje su zadesile našu općinu, kontinuirano se nastavlja sa zagađenjem rijeke Spreče, što za posljedicu ima veliki broj oboljelih od karcinoma na području općine Gračanica, pomor ribe, zagađenje životne sredine i uništavanje flore i faune u Sprečkom polju. Dosadašnje aktivnosti na suzbijanju zagađenja rijeke Spreče i Sprečkog polja nisu dale pozitivne rezultate te vas s toga molim da izvršite reviziju rada i učinkovitosti inspektorata vodne inspekcije i inspektora koji je do sada obavljao inspekcijski nadzor. S obzirom da nema rezultata u suzbijanju zagađenja, molim vas da poduzmete adekvatne mjere. Uz inicijativu prilažem i preporuku “Agencije za vodno područje rijeke Save” u kojoj se jasno vidi koje mjere treba poduzeti”.

Pošto nije bilo više prijavljenih vijećnika za postavljanje pitanja prešlo se na raspravu o predloženom dnevnom redu.

Nije bilo učesnika u diskusiji i predsjedavajući Vijeća je pročitao dnevni red 22. sjednice Općinskog vijeća Gračanica koji glasi:

1. IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01.01. – 30.06.2014.GODINE
Izjestilac: Nusret Helić, Općinski načelnik
2. IZVJEŠTAJ O UTROŠKU SREDSTAVA TEKUĆE REZERVE ZA PERIOD 01.01. – 30.06.2014.GODINE
Izjestilac: Nusret Helić, Općinski načelnik
3. ODLUKA O OVLAŠTENJU OPĆINSKOG NAČELNIKA ZA OBJAVLJIVANJE JAVNOG KONKURSA
Izjestilac: Nusret Helić, Općinski načelnik
4. IMENOVANJE KOMISIJE ZA PROVOĐENJE JAVNOG KONKURSA U POSTUPKU PRENOSA PRAVA VLASNIŠTVA NA NEKRETNINAMA VLASNIŠTVU OPĆINE
Izjestilac: Nusret Helić, Općinski načelnik
5. RAZRJEŠENJE I IMENOVANJE PREDSJEDNIKA I ČLANA KOMISIJE ZA ETIČKI KODEKS, RAVNOPRAVNOST SPOLOVA, PRAVA I SLOBODE ČOVJEKA, PREDSTAVKE I PRITUŽBE
Izjestilac: Zehra Mujačić, sekretar Općinskog vijeća
6. IZVJEŠTAJ O REALIZACIJI PROGRAMA KAPITALNIH INVESTICIJA OPĆINE GRAČANICA 2010-2014.GODINE, ZA 2013.GODINU
Izjestilac: Razija Junuzović, viši stručni saradnik za lokalni razvoj
7. IZVJEŠTAJ O PROVOĐENJU LOKALNOG AKCIONOG PLANA I ZAŠTITE ŽIVOTNE SREDINE OPĆINE GRAČANICA 2012-2017.GODINA, ZA 2013.GODINU
Izjestilac: Razija Junuzović, viši stručni saradnik za lokalni razvoj

Dnevni red je usvojen jednoglasno.

TAČKA 1.

IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01. 01. – 30. 06. 2014. GODINE

Uvodno obrazloženje po prvoj tački dnevnog reda dao je Općinski načelnik Nusret Helić: “Poštovani predsjedavajući, radno predsjedništvo, uvaženi vijećnici, mediji i gosti, sve vas pozdravljam i želim uspješan rad na današnjoj sjednici Općinskog vijeća.

Vi ste uz izvještaj o izvršenju budžeta za prvo polugodište 2014. godine dobili i detaljno obrazloženje i pojašnjenje, te nema potrebe za većim dodatnim pojašnjenjima, ali ima potrebe da kažem nekoliko rečenica.

Na početku da pomenem, da smo mi usvojili i rebalans budžeta 30. 06. ali zbog toga što je stupio na snagu nakon objavljivanja u Službenom glasniku Općine Gračanica 02. 07. nismo ga mogli uvrstiti u izvještaj, te su izvršenje budžeta i procenti ostvarenja iskazani u odnosu na budžet usvojen u decembru 2013. godine.

Ukupni prihodi za 6 mjeseci su ostvareni u iznosu od 4.598.648 KM ili 80,22 %, odnosno manji su od plana za blizu 1.200.000 KM.

-Porezni prihodi su ostvareni 87,33 %

-Neporezni prihodi su ostvareni 93,93 %

-Tekući grantovi-potpore su ostvareni 184,98 %

to je rezultat sredstava za topli, situaciju koja je stigla,

-Kapitalne potpore i grantovi su ostvareni 7,98 % i ovo slabije ostvarenje je najviše uticalo na ukupan slabiji procenat ostvarenja prihoda.

Zabrinjava pad prihoda od PDV-a koji čini najviše prihode budžeta. Jasno je da su i ove nesreće uticale i uticat će na dalji pad prihoda od PDV-a, jer su mnoge firme pretrpile štete i nisu radile. Treba biti spreman na to i u skladu sa tim usklađivati rashode do kraja godine.

Kada su u pitanju izdaci oni su ostvareni u iznosu od 4.158.739 KM ili 72,55 %.

Tekući izdaci su ostvareni u iznosu od 3.225.686 KM ili 91,51 % a odnose se na plaće i naknade zaposlenih i vijeća, materijalne troškove, tekuće grantove, vanjske korisnike, kamate i drugo.

Kapitalni izdaci su ostvareni u iznosu od 686.000 KM ili 37 %, što je znatno manje od planiranog iz razloga što su i prihodi za te namjene manje ostvareni.

Otplata duga po kreditima i zaduženju ostvarena je u iznosu od 247.000 KM ili 68% i ona ide redovno, one su prioritet.

Ukupan suficit ostvaren je u iznosu od 1.231.736 KM i odnosi se na suficit iz ranijeg perioda u iznosu od 791.000 KM i suficit za 6 mjeseci u iznosu od 439.909 KM.

Radi se uglavnom o namjenskim sredstvima i nerealizovanim projektima.

Od kraja juna pa do danas stanje izvršenja je sasvim drugačije, usklađuje se sa rebalansom, neke disproporcije se ispravljaju, a neke korisnike, namjene i projekte se obezbjeđuju sredstva i izvršavaju obaveze i budžet se izvršava u skladu sa ostvarenim prihodima i prioritetima.

Normalno, da je i ovo stanje prirodne nepogode uticalo na samo izvršenje, jer neki projekti nemogu čekati, radi se interventno, ali i počela su pristizati neka donatorska sredstva pa će neminovno doći i do rebalansa, ako ne prije, sigurno u oktobru mjesecu.

O tome šta je urađeno kada su u pitanju elementarne nepogode, šta se radi i koliko je došlo sredstava, bit ćete informisani kroz materijal koji se sprema za posebnu sjednicu u prvoj polovini septembra.

Samo još da podsjetim: uvijek se u izvršenje budžeta za prvo polugodište išlo opreznije zbog bojazni da ne potrošite više nego što se ostvari prihoda i ne uđete u deficit kojeg je teško ispraviti.

Da je to tako potvrđuje činjenica da su nam već stigle nove projekcije prema kojima se

prihodi po osnovu PDV-a našoj općini smanjuju za blizu 100.000 KM.

Šta nas još čeka možemo samo nagađati.

Potvrdile su to i ove zadnje nepogode. Smatram da je ovo dovoljno, jer imate obrazloženje. Hvala.

Komisija za propise i Komisija za budžet razmatrale su izvještaj i nisu imale primjedbi.

Učesnici u diskusiji su:

Omerdić Mirza:

“Evo ovdje je jako simpatično ovo što je načelnik kazao, a to je da je smanjen priliv budžetskih sredstava sa viših nivoa vlasti i to u najvećem omjeru. Ovi prihodi koje kontrolira Opština su negdje 7 %. Ja se bojim dakle, imali smo ovih nekakvih donacija od strane viših nivoa vlasti da kažem tako, pa ono što je redovno možda će postojati mogućnost da oni umanje za ove redovne stvari. Ne znam da li postoji mogućnost, ali možda postoji realna da oni razmišljaju na takav način. Dakle, mi bi morali biti u malo jačoj komunikaciji s obzirom da ova sredstva koja smo dobili od viših nivoa vlasti, ustvari predstavljaju pomoć za sanaciju, a na redovne stvari moraju ostati onakve kakve jesu, da se dakle ne pravi nekakva zamjena, pa da nam kažu, mi smo vama pomogli. Želim da kažem da budemo tu oprezni i da budemo u stalnoj komunikaciji sa tim višim nivoima vlasti. Izvršenje budžeta je takvo kakvo jeste. Dešavale su nam se dosta teške, dosta loše stvari. Jako je potrebno na napravimo ovu vanrednu sjednicu gdje ćemo razmatrati ove stvari na koje ćemo reći na koji način ćemo djelovati. Kako prikupiti sredstva, kako organizovati projekte i eto ja se nadam da će to biti što prije”.

Vehid Osmanović:

“Klub vijećnika SDP-a će podržati ovo izvršenje budžeta za prvih šest mjeseci”.

Omerdić Mirza, je ne izlazeći za govornicu u ime Kluba SDA zatražio pauzu.

Nakon pauze Mirza Omerdić je iznio sledeće:

“Mi smo izvršili konsultacije, Klub SDA će podržati izvršenje budžeta. Takav je kakav jest uz dodatak da će Klub SDA u okviru vanredne sjednice tražiti od Kolegija da se u okviru te vanredne sjednice razmatra i bezbjedonosna situacija u gradu. Dakle, da nam se dostave i izvještaji u ovim vremenima, rad preduzeća u vlasništvu Opštine, dakle svih javnih ustanova i rad organa Opštine”.

Prešlo se na izjašnjavanje i Izvještaj o izvršenju budžeta Općine Gračanica za period 01. 01. – 30. 06. 2014. godine je usvojen jednoglasno sa 26 glasova “ZA”.

TAČKA 2.

IZVJEŠTAJ O UTROŠKU SREDSTAVA TEKUĆE REZERVE ZA PERIOD 01.01. – 30. 06. 2014.GODINE

Nije bilo dodatnog obrazloženja.

Za diskusiju se javio Mirza Omerdić i iznio sledeće:

„Neću vas dugo zamarati. Mi smo na komisiji razmatrali i ja sam uputio jednu zamjerku SDA.

Dakle, budžetska rezerva je iskorištena za proljetnu rekonstrukciju glavnog i pomoćnog gradskog terena. To nam je malo u ovim trenucima bilo da kažemo nepotrebno s obzirom da imamo prećih stvari gdje se mogla budžetska rezerva utrošiti“.

Nakon toga Izvještaj o utrošku sredstava tekuće rezerve za period 01. 01. – 30. 06. 2014. godine je usvojen jednoglasno sa 26 glasova “ZA”.

TAČKA 3.

ODLUKA O OVLAŠTENJU OPĆINSKOG NAČELNIKA ZA OBJAVLJIVANJE JAVNOG KONKURSA

Dodatno obrazloženje za ovu tačku dnevnog reda dao je Općinski načelnik Nusret Helić:

“Samo kratko, ima tamo u obrazloženju neke nelogičnosti, u zadnjem stavu, pa da se to ispravi iako kad je u pitanju Odluka obrazloženje se ne objavljuje. Suština je da ovaj postupak oko dodjele placeva, nakon usvajanja Zakona, onda Pravilnika, ubrzamo. Određeno je tamo da Vlade, kad su u pitanju viši nivoi vlasti ne utvrđuju ovo. Kad je u pitanju opštinski nivo trebalo je Vijeće da vodi postupak raspisivanja i ovu Odluku predložimo samo zbog efikasnosti, da to vodi načelnik jer odmah sutra treba utvrditi kriterije, raspisivati oglas, da se nebi čekalo oko sledeće sjednice Vijeća. Kad sam već izašao da kažem i neke podatke. Ovih pet dana smo zaista bili mobilni. Od ovih poslednjih elementarnih nepogoda, vi ste vidjeli ko sve nije došao ovdje. Od Vlada, od Muftije Tuzlanskog, od svih mogućih, a rezultat toga je da mi u ovih pet dana imamo obezbijeđeno blizu pola miliona. Sad je Vlada donijela Odluku za 300.000,00 govorimo za saniranje kuća, krovova. Juče je muftijstvo donijelo Odluku i uplatilo odmah 100.000, Općina Novo Sarajevo je juče bila i uplatila 10.000, Općina Lukavac pa i neke firme doniraju, crijep i slično, govorim da u ovom svemu, u čitavoj državi vlada jedinstvo. To nam je sada prioritet, ali vidite da se iz dana u dan mijenja prioritet. Nama su prioritet bile srušene kuće, nije došlo dovoljno para, u međuvremenu je došlo za intervencije oko 400.000 KM, ne za kuće, i o tome ćete imati informaciju do petog, gdje, kako i u što će se uložiti. Sutra će biti za komisiju 120.000, da se utvrde prioriteti kad su u pitanju kuće, i ovi krovovi, dali treba još intervenisati. Govorim o ovoj komisiji koja utvrđuje prioritete. Tako da znate da smo mobilni non-stop, kako ko i u kom sazivu, a ja neću reći ponestaje mi snage. Ponestaje mi nekad koncentracije, jer se treba non stop biti na terenu evo i sada i ja a i šef Civilne zaštite. Da znate da smo obezbijedili i već se dijeli oko 70.000 crijepa. Uspostavili smo tamo Krizni štab koji je zajedno sa nama, pa i sa efendijama. Muftijstvo je izdvojilo sredstva i hoće i oni da se uključe da pravimo prioritete. Sad nam je prioritet da pokrijemo ono što nije pokriveno, a iz sredstava koja će leći valja namirivati i onima koji su se zadužili pa kupili crijep. Nije lako, 1.620 objekata je stradalo. U Orahovici je najviše i to negdje million i sto komada crijepa. U Miričini je negdje oko dvjesto i nešto hiljada, a u Rašljevi je najmanje. Ima pomaka, dakle, imat ćete sve ovo na sjednici. Toliko”.

Sead Gazibegović:

“Samo da vas obavijestim da je sindikat radnika Elektroprivrede u toku današnjeg dana odlučio uplatiti nekih 52.000 komada crijepa i 1.000 koruga, u vrijednosti oko cca 50.000,00 KM”.

Prešlo se na izjašnjavanje i Odluka o ovlaštenju Općinskog načelnika za objavljivanje javnog konkursa je usvojena jednoglasno sa 26 glasova “ZA”.

TAČKA 4

IMENOVANJE KOMISIJE ZA PROVOĐENJE JAVNOG KONKURSA U POSTUPKU PRENOSA PRAVA VLASNIŠTVA NA NEKRETNINAMA VLASNIŠTVU OPĆINE

Nije bilo učesnika u diskusiji i Rješenje o imenovanju Komisije za provođenje javnog konkursa u postupku prenosa prava vlasništva na nekretninama vlasništvu Općine je usvojeno jednoglasno sa 26 glasova "ZA".

TAČKA 5

RAZRJEŠENJE I IMENOVANJE PREDSEDNIKA I ČLANA KOMISIJE ZA ETIČKI KODEKS, RAVNOPRAVNOST SPOLOVA, PRAVA I SLOBODE ČOVJEKA, PREDSTAVKE I PRITUŽBE

Nije bilo učesnika u diskusiji od strane vijećnika, ali se Vijeću obratila Larisa Šuša s obzirom da se radi o razrješenju nje kao člana Komisije:

"Ja sam tražila da se obratim čisto iz razloga da se na mom imenu i prezimenu kao članu Etičke komisije nebi populistički danas ovdje razglabalo i raspravljalo o tome dali treba da ja budem kao član Etičke komisije ili ne trebam, pa evo ja ću se kratko obratiti. Izuzetno je bitno da moje obraćanje Općinskom vijeću bude prije samog glasanja, kako se moja smjena nebi iskoristila populistički od strane pojedinih klubova Općinskog vijeća. Kako ste i sami upoznati u više navrata sam se lično žalila na neaktivnost i rad Komisije za etički kodeks, te sam zbog istih razloga i neaktivnosti više predsjednika ove komisije iz iste i sama željela istupiti. Sa druge strane ja sam u komisiju predložena kao član SDP-a, a kako to već više mjeseci nisam...molim vas da se smjena jednoglasno usvoji ... ili u protivnom i sama dajem ostavku bez obzira na stav Vijeća. Smatram da se desetine puta etički kodeks povrijedio/narušio i bez obzira na izvještaj mene kao člana Komisije za etički kodeks, koji između ostalog nisam imala kome ni predati smatram da je trenutno ova kao i mnoge druge komisije "tek mrtvo slovo na papiru" tačnije ne služe ničemu niti imaju uticaj u funkcionisanju izvršne, zakonodavne ili sudske vlasti, a još više ne rade ništa u interesu građana Gračanice. Lično sam vrlo savjesno i odgovorno pristupila obavljanju i izvršavanju svojih obaveza i odgovornosti. Smatram da sam u proteklom periodu na zasjedanju Komisije, kao i u direktnom obraćanju OV iznijela desetine konstruktivnih prijedloga sa ciljem unapređenja rada Komisije. Vrlo bitno za napomenuti da je u finalizaciji izrada Protokola za prevenciju nasilja u porodici, pa vas molim da budući članovi i predsjednik Komisije što prije preuzmu obavezu prema istom jer se određene aktivnosti i prijedlozi moraju do oktobra mjeseca ove godine finalizirati. Zahvaljujem se svima na dosadašnjoj saradnji i novoformiranom tijelu želim puno bolji, produktivniji rad, a duboko vjerujem da će tako biti uzimajući u obzir da na čelo Komisije dolazi izuzetno odgovorno lice. Larisa će kao građanin dati daleko veći doprinos. Hvala i sretno svima".

Za diskusiju se javio Omerdić Mirza:

"Htio bih da pitam ovdje, s obzirom da je Larisa kazala, koliko sam ja shvatio da ona daje ostavku, da pitam zbog čega se vrši razrješenje postojećih članova? Nemam obrazloženja, da li je došlo do povrede Poslovnika i slično".

Hasić Mujo:

"Ovo su komisije, radna tijela koje su podijeljene po nekim političkim strankama. I znači

ovdje se samo vrši zamjena. Znači stranka vrši zamjenu određenih imena i prezimena iz razloga što su neki lično tražili, ali ovo apsolutno ne mijenja stvar. Sve su stranke koje učestvuju u radu Vijeća ravnomjerno zastupljene. Ta dva člana pripadaju SDP-u i ona vrši zamjenu ta svoja dva člana”.

Safet Pjanić:

“Mi smo samo tražili pojašnjenje zbog čega se smjenjuje Larisa Šuša? Ništa drugo. Sad smo dobili objašnjenje, vjerovatno zbog istrošenosti Larise, dolazi novi član svježiji, aktivniji da to malo bolje radi. Sad je u redu, sad znamo šta je”.

Larisa Šuša:

“Ja zamolih da se ne koristi populistički, ali evo, Larisa nije istrošena nimalo, čak se to vidi iz priloženog. I dalje će da radi jako aktivno na nekom drugom polju. SDP isto tako kao i SDA ima puno pravo da mijenja, smjenjuje, predlaže kandidate itd. Ja nikoga ne štitim ovdje, u ovom slučaju. Imali smo slučaj dva predsjednika ispred SDP-a ove komisije koji nisu radili svoj posao. Jedan je dao ostavku, jedan je smijenjen i uzimajući to u obzir, znači vrlo jasna priča. Radiš ili ne radiš, a onaj koji radi a ne želi biti dio neke priče u svakom slučaju se sankcionira prema određenim pravilnicima i dalje. Ostavite priču na temelju Larise Šuše, istrošene”.

Zajim Nurić:

“Gospodine, predsjedavajući ja imam primjedbu na vaše nepoštivanje Poslovnika. Sve ovo je proizvela činjenica da ste vi po zaključenju, kazali ste ima li neko diskusiju po ovoj tački dnevnog reda. Nema, i onda ste pozvali gospođu Larisu, pošto nije bilo prijavljenih vijećnika. Samim tim, diskusija je završena i poslije toga se proizveo Mujo, Huso, Zajim, itd. Mislim da to ne treba raditi i da Poslovnik ne treba narušavati. Ovo je moja dobra namjera da nam ne pređe u naviku”.

Predsjedavajući Vijeća se zahvalio na upozorenju, nakon čega se prešlo na izjašnjavanje.

Rješenje o razrješenju predsjednika i člana Komisije za etički kodeks, ravnopravnost spolova, prava i slobode čovjeka, predstavke i pritužbe usvojeno je sa 24 glasa “ZA” i 2 “SUZDRŽANO”.

Rješenje o imenovanju predsjednika i člana Komisije za etički kodeks, ravnopravnost spolova, prava i slobode čovjeka, predstavke i pritužbe usvojeno je sa 17 glasova “ZA” , 3 “PROTIV” i ostali “SUZDRŽANO”.

TAČKA 6

IZVJEŠTAJ O REALIZACIJI PROGRAMA KAPITALNIH INVESTICIJA OPĆINE GRAČANICA 2010 - 2014. GODINE, ZA 2013. GODINU

Nije bilo učesnika u diskusiji i Izvještaj o realizaciji programa kapitalnih investicija Općine Gračanica 2010 – 2014. godine, za 2013. godinu je usvojen sa 1 glasom “SUZDRŽAN” a ostali “ZA”.

TAČKA 7

IZVJEŠTAJ O PROVOĐENJU LOKALNOG AKCIONOG PLANA I ZAŠTITE ŽIVOTNE SREDINE OPĆINE GRAČANICA 2012 - 2017. GODINA, ZA 2013. GODINU

Nije bilo učesnika u diskusiji i Izvještaj o provođenju lokalnog akcionog plana i zaštite životne sredine Općine Gračanica 2012 – 2017. godina, za 2013. godinu je usvojen jednoglasno.

Sjednica je završena u 12,35 sati.

Zapisnik vodio: Damir Delić

Tonski snimak sjednice uredno je arhiviran.

Damir Delić

PREDSJEDAVAJUĆI
OPĆINSKOG VIJEĆA

mr.sc. Edin Ibrišević